

Asisko gutuna

2019ko azaroa. 1. printzipioa. Egunero bilatzea Jainkoarekin harreman pertsonala 133. zenbakia

Aspaldiko lagunak elkartzen garenean, edota bikotearekin solas lasaian gaudenean gogoratu ohi ditugu pasarte gozoak. Nola ez ditugu bada gogoratuko Jainkoarekin bizi izandakoak?

Frantziskok behin eta berriz ekartzen zituen Jesusen pasarte gogoangarrienak: bere jaiotza, azken afaria eta nekaldi-heriotzak. Gogoratu, dastatu, gozatu eta sufritzeko. Jesusekin bat egiteko.

Gogoetarako gaia

Jainkoaren memoria egin

Pertsonok uste duguna baino askoz sarriago lantzen dugu memoria. Eta ez soilik zer zeregin ditugun agendan, edo izenak edo pertsonen aurpegiak gogoratzeko, haurtzaroko pasarteak gogoratzeko, edo ikasitako ikasgaiak gogoratzeko. Memoria erabiltzen dugu birbizitzeko, hau da, berriro bihotzera ekartzeko. Zentzu honetan, memoriara ekartzen dugunean nola ezagutu nuen nire bizi-tzako maitasuna, edo gure seme-alabak jaio zirenekoa, edo bizitza aldatu zidan gertakari hura, ez dugu soilik oroitzen iragana, baizik eta hori gogora ekartzeak berriro egiten du, berriro bizitzeko aukera ematen digu, eta horrela, bizi izandako eta orduan sentitutakoa berriro, lehen aldiz izango balitz bezala, berriro ere gertatzen da.

Hebertarrek horixe bera egiten dute Biblia osoan zehar. Jainkoak haiengatik egin duena etengabe gogoratu. Eta etsipenezko egoera la-

rrian aurkitzen direnean eta Jainkoari dei degiotenean laguntza eskatuz, gogoratzen dute Jainkoa beti atera dela bere herria laguntzera. Horregatik da itxaropenaren herria: memoria egiten dutelako, eta memoriak fidatzen eramaten ditu, sinestera lehen jokatu zuen bezala berriro ere jokatuko duela, Jainkoa fidela delako, eta demostratu du.

Guk ere Jesusen memoria egiten dugu, etengabe. Egin zuena eta esan zuena gogoratzen ditugu. Bere bizitza, heriotza eta berpiztea gogoratzen ditugu. Baina batez ere azken afarian egin zuena gogoratzen dugu, gogoratzen dugun bakoitzean bera presentzia bizia gertatzen zaigulako. Horregatik gogoratzen dugu, behin eta berriz bihotzera ekarri nahi dugulako, birbizi nahi dugulako, dastatu nahi dugulako. Gure Jauna delako, eta beragandik bizitza jasotzen dugulako.

Ebanjelioko pasarteak: Dt 26, 1-10

Jaunak zeure Jainkoak ondareztat emango dizun lurraldean sartu, haren jabe egin eta bertan biziko zarenean, Jaunak emandako lurraldeak ekarritako emaitza guztien lehen fruituak saski batean hartu eta Jaunak zure Jainkoak bizileku eta kultu-lekutzat aukeratuko duen tokira joango zara. Han, egun haietan zerbitzu-txandan egongo den apaizarengana aurkeztu eta esango diozu: “Gaur Jaunaren zure Jainkoaren aurrean aitortzen dut, Jaunak gure arbasoei zin eginez emango zigula agindutako lurraldera iritsi garela”. Apaizak zure eskuetatik saskia hartu eta Jaunaren zure Jainkoaren aldare aurrean ipiniko du. Orduan, aitorten hau egingo duzu Jaunaren zeure Jainkoaren aurrean: “Jaunak Egiptotik atera gintuen ahalmen handiz eta esku indartsuz, mirari eta egintza harrigarriak eginez, etsaiengan izua sortuz. Eta toki honetara ekarri gaitu, eta esnea eta ezta darizkion lurralde hau eman. “Orain, beraz, hemen dakartzat, Jauna, zeuk eman didazun lurreko emaitzen lehen fruituak”.

Frantziskotar espiritualtasuna

Aitaren Hitz hau, hain duina, hain santu eta ospetsua, Goi-goiko Aitak iragarri zuen zerutik Gabriel aingeru santuaren bitartez, eta Maria Birjina santu eta agurgarriaren sabelera bidali zuen eta beraren sabelean hartu zuen egiazko gure giza gorputz argala. Eta aberatsa izanik, beste ezer baino nahiago izan zuen mundu honetan pobretasuna aukeratzea, bere Ama, Birjina guztiz dohatsuarekin batera. Eta nekaldia hurbil zuela, Pazkoa ospatu zuen bere ikasleekin; ogia hartu eta, esker oneko otoitza egin eta bedeinkazioa esan ondoren, zatitu egin zuen, esanez: "Hartzazue eta jan, hau nire gorputza da". Gero, kopa hartu eta esan zuen: "Hau nire odola da, Jainkoarekiko ituna berrituko duena, zuen alde eta guztien alde bekatuak barkatzeko isuria". Ondoren, honela egin zion otoitz Aitari: "Aita, nahi baduzu, urrun ezazu niregandik edari samin hau". Eta izerdia tantaka zerion lurrera, odola bezain lodi. Baina bere borondatea Aitaren borondatearen baitan jarri zuen, esanez: "Aita, egin bedi zure nahia; egin bedi zuk nahi bezala, ez nik nahi bezala". (2FG 4-10)

Otoitza

Zuk nahi izan duzulako
hemen nago, Jauna. Zure izenean.
Ez naiz ni etorri; xurgatu egin nauzu
zure maitasunaren kiribilean.
Inor ezin da zugana hurbildu
Zuk osorik besarkatu gabe.
Ezer lapurtu gabe
guztia berari emanaz.
Lurretik bururaino
Zure opari naiz,
hegan egiten duen espiritua
eta adierazten duen gorputza.
Ezin zara jada

mundu honetatik atera.
Urez estali ninduzun
eta, Zutaz blaituta,
zure hazia ereiten ari natzaizu
ereiten dudan aldi berean,
nire anai-arrebentzako gari ale eginez.
Ez dut bakarrik geratu nahi
Zure aurpegia bilatuko dut, Jauna,
zuri Aita esan arte.
Baina soilik aurkituko zaitut,
zuregandik sortzen den guztian
Anaia esan zaitzadanean!

Ignacio Iglesias

Gutuneko azken hitzak

"Gogoan har Jesukristo, hiletatik piztua" (Liturgiako abestia)

2019ko azaroko eguneroko Ebanjelioa

Egunero Ebanjelioa irakurri nahi duten lagunek, egun bakoitzari dagozkion irakurgaien arabera, hemen dauzkate azaroko erreferentzia guztiak:

1 Mt 5, 1-12	7 Lk 14, 25-33	13 Lk 17, 7-10	19 Lk 18, 35-43	25 Jn 18, 33-37
2 Mt 25, 31-46	8 Mt 5,13-16	14 Lk 17, 11-19	20 Lk 19, 1-10	26 Lk 21, 1-4
3 Lk 14, 1-6	9 Lk 16, 1-8	15 Lk 17, 20-25	21 Lk 19, 11-28	27 Lk 21, 5-11
4 Mk 12, 28-34	10 Lk 16,9-15	16 Lk 17,26-37	22 Lk 19, 41-44	28 Lk 21, 12-19
5 Lk 14, 12-14	11 Mk 12,38-44	17 Mt 25, 31-40	23 Lk 19, 45-48	29 Lk 21, 20-28
6 Lk 14, 15-24	12 Lk 17, 1-6	18 Mk 13, 24-32	24 Lk 20, 27-40	30 Lk 21, 29-33

Geure web gunea bisitatu

www.asissarea.org



Asis Sarea

646 21 48 96

Azaroko Otoitza
hilaren 28an izango da.